

P. 677, L. 1【十神力】《妙法蓮華經文句》卷 10：「問：何以知十相表現意，復表將來意？答：文云『我以如來神力，為囑累此經，故猶不能盡』，表現、表將，其義明矣。」(T34,p.142a20-22)《法華文句記》卷 10：「十神力者，前五正明現在流通本迹，後五總表未來不已。又前五中，初一令眾總信本迹，次四即是現在四一。第二表二門理一，智家之境故云智境。第三表二門教暢，即是教一。第四表二門入實，即是人一。第五表二門破惑，即是行一。第六門中既指五千、被移、失心三類人者，如此三例即是滅後得益之人。所言『機』者，機義當總，總於未來四一故也，即是得於四一之益。下去四相，別表未來四一，文自結名，但各述其要，令成一也。所以四但云一，不言本迹者，在未來故，尚未入實，誰論其本？若見實者，亦見其本，故總結云『表現表將』。將，猶當也。」(T34,pp.349 c24-350a7)

P. 679, L. 5【教菩薩法、佛所護念】參考(p.79-80)。『無數諸法門。其實為一乘。』『普欲令眾生。亦同得此道。』『若有聞法者。無一不成佛。』。『佛自住大乘。以此度眾生。』『終不以小乘。濟度於眾生。』『是諸世尊等。皆說一乘法。化無量眾生。令入於佛道。』

P. 679, L. -5【合掌向娑婆世界】《法華經授手》卷 9：「此十方眾生藉佛光被。聞虛空之音。遂知于佛興供相也。彼諸眾生一聞空中之聲。何以便合掌稱名？且遙呈種種寶物。共散娑婆？亦以佛神力故也。惟佛以神力現示。故於盡十方法界。若己若人。總得開佛知見。彼此不分。故各於自所住處。作諸供養也。若論此中本始二覺。則一切人於第六神力中。已見釋迦與多寶同居一塔。至於分身諸佛一切菩薩。皆已明見。又何用天人再告。須知由聞此聲。又得一翻親切。所以說向娑婆。於處親切。稱如來名。於理親切。既有所向有所尊。則知無不明。此可謂真得佛知矣。」(X32,p.787c8-18)

P. 680, L. 1【變成寶帳】《法華經合論》卷 6：「凡為此者。欲以開顯色心不二故。何以故？是所散諸妙供具。無有心識。而能從十方來。又能變而為帳。則色心不二之旨也。」(X30,p.417b7-10)《法華經通義》卷 6：「以理融事。通歸法界也。」(X31,p.586b20-21)《法華經演義》卷 6：「寶帳乃表眾生因心。所有定慧。全歸如來果德慈悲之中。故變成寶帳以表顯也。徧覆佛上者。蓋因心之定慧。元極果之所宗。果德之慈悲。亦即因心之所具。故以彼之供具。變成寶帳。覆於佛上而表顯也。如能見於佛。開於唱勸。而能歸命興供等。皆是如來不思議神力使然。欲表顯彼之眾生。未來亦能從妙經得益。故如是耳。乃冥約

其機。有此之事。在彼眾生。未即能如是也。」(X33,p.267c16-24)

P. 680, L. 4【無礙如一佛土】《法華經授手》卷 9：「此總繳由佛神力。十方世界與娑婆世界。皆悉融通為一佛土相也。世界。是依正二報之總名。且器界本無分限疆域。皆是強名。而正報眾生。固為一理。由知見妄生。致令眾塵隔越。所謂『無同異中。熾然成異』者。皆妄也。虛妄既立。知見妄分。所以在眼分為見。在耳隔為聞。故謂『元以一精明。分成六和合』也。世尊於無量劫。證此無礙妙理。觀一切人大夜難曉。故特為此大事因緣出世。開示之也。今既開示已極。而一切人知見亦極。是翻前迷境為大覺場。故于十方世界。昔所不通不達、最滯最礙之所。而今豁然貫徹。故曰通達無礙如一佛土也。如來始自放光現瑞。出定歎德。開權顯實。廢迹顯本。共二十品經文。妙法深談。至此神力妙現。至此本迹融會。至此生佛同證。至此轉虛妄知見成諸佛知見。至此無一針鋒處不是佛知。無一微塵裡不是佛見。始完如來出世為一大事因緣，開示悟入之本心本願也。」(X32,p.788a5-21)【繳⁴】交出；交付。《法華經大成》卷 8：「通為一者。情消理融。合眾界而為一也。開會至此。將此一卷大經。普覆世界。徹上徹下。無有絲毫覆藏。故下文叮嚀讚歎。令其一心受持也。」(X32,p.515b16-19)《法華經知音》卷 6：「初佛三變淨土。猶多移置人天。今既容退席移置者。見聞禮敬。則退者進。而移置者元不曾動。故十方世界通達無礙。如一佛土。吾佛、多寶佛、分身佛願心滿。而法報化三身。宛然一體也。凡聖土、方便土、實報土。同一寂光。無彼此色相可見也。華嚴經云。若有欲識佛境界。當淨其意如虛空。遠離妄想及諸取。令心所向皆無礙。杜順偈云。若人欲會真空理。身內真如還徧外。情與無情共一體。處處皆同真法界。皆此義也。妙法談至此。佛神力現至此。無鍼鋒處不是佛法身充滿。無微塵孔不是佛淨土完全。知此見此。謂之開示悟入佛之知見也。一大時教。何有奇特如此。吾信法華經。真為諸經中之王矣。」(X31,p.455b2-15)

P. 680, L. 8【佛告上行】《法華經大成》卷 8：「告上行等者。乃地涌導師之大眾也。以八萬等。各有本事之佛。各受本師付囑。上行等。乃本時所化嫡嗣。欲傳吾道。必我弟子。非弟子不足以囑累故。又上行等。乃舊住此界之宿學。如來如是神力。非耆宿不足為證故。又前召本弟子。地涌初出。禮拜讚歎。於二世尊。四上首合掌問訊。本師應當付囑弘經。彼時彌勒領八千恒沙菩薩。決疑請問。如來不及付囑。就顯壽量。到此在範已盡。兼地涌發願。故如來欲付囑。先告上行等也。以是神力者。總收十種。以如是莫大之神力。不盡此經功德者。如來一切深妙功德。盡萃於此經。故不可窮盡也。」(X32,p.515b21-c7)